

Suplemento Especial Del CONOSUR Nº 159


# Conosur Ñawpaqman

D.L. 2 - 3 - 03 - 94

Julio • 2016

Revista rural bilingüe para la Nación Quechua

## Balance Cosechas Ciclo agrícola 2015-2016



Periódico Conosur Ñawpaqman chaqra llank'aqkunata, Imayna paras karqa?, tarpusqas waliqlatachu puqun?, mikhunapaq kanqachu? nispa runa masita tapurirqayku. Mana qarpayuy jallp'apiqa uk kutillata watapi puqun, chayrayku sumaqta tiempota qhawarispata tarpukunku, chayman jina cosechas uqharikun.



Paredones: "Uchhika puquchisqayta feriaman apachkani".

## "Tiempo qhawaqkunapis manaña jap'ichinkuchu"

### "Sunquy junt'asqa kachkani"

**Francisco Montaña (80 años) Aguada, Municipio Vacas:** "Cosechasqa waliqla, papa, cebada, granos, sarapis chay wayq'uypi sumaq puquykun, yuraq sarita karqa, trigota q'ara uma ninku chayta tarpurqani, may waliqta chaypis puqun, chaymanta sunquy junt'asqa kukitaman jamukurqani, mikhunapaqqa karin, kay ladomanqa as qhasayuy, ukhumanri qhasa mana kanchu. Unayqa sumaqta puquq papaqa, nuqapis jallp'api q'ayrusta allaspa chayman jallch'aq kani, kunan jallch'anapaq mana valenñachu, khurullaña".



### "Tiempota kay qhipasqa manaña qhawaykuchu"

"Tiempota mana waturqanichu, ñawpa abuelos niq kanku 1 de agostostomanta qhawana, yupana hasta 12 de agosto, kay qhipaman manaña qhawaykuchu, tiempo variapunña, manaña calculankuchu, kunanpis nirqanku Tata Cruzkama paranqa, mana paranchu, ñawpaqta ririkapun para, qhipatataq jamun anchay pisiyachin. Wakinpataqa mana kanchu familiata uywanapaq".

### "Gobierno productota allin preciopi rantinan kanman"

"Precioqa ancha bajo, 150 carga uqa, papapis carga 200, mana agricultorpaq conbienenchu, agricultorqa gobiernollamanñasina rina kanqa. Gobiernoqa productota allin preciopi rantinan kanman", nin Andrés.

### "Kay wata ni mujuntapis uqharisqaykuchu"

**Andrés Cruz Gonzales (56 años) P'isqumayu, Municipio Vacas:** "Kay wata kay niqsitupi enteroqta papa mana kanchu, ni mujunta uqharisqaykuchu. Granizo, helada jamun, t'ikasaptin jap'irpan, q'alata panpacharpan puquyta. Kay jallp'itamanta mujuta uk 7 cargasta churani, waliq puquptin uk 50 cargasta uqharichkayman karqa, kunanri 10 carguitasta uqharikuni, t'unataq, mana kanchu qullqi papa, chapara ima. Uqaga waliqla, cebada paramanta jina ch'usu pùqurpan, avenapis pisi, forraje uywaspaq pisitallapaq, kay wataqa wisitallapaq, vendenapaq mana kanqachu".

### "Mana para kaptin juturisniyku ch'akipun"

**Hilaria Gabello, Inca Wasi (60 años), Mizque:** "Sara tipiypi kachkayku, yakuyuyki kusalla puqun, temporalespi mana kanchu, seco ch'akipun. Temporalpapis tiyan jallp'asniy, mana paraptin mana tarpumuykuchu. Holandesa papita waliqlata puqurqa. Juturisniyku pisi para kaptin ch'akipun. Organización ukhupi parlariyku, listasta uqharinku, kunankama ni ima chayamunchu".



Uqapis q'ala khurusqa

### "Para mana kanchu, kawsanapaq jinalla puqun"

**Tata Lorenzo Salazar, Villa Moderna, Mizque:** "Allin p'unchay periodicowan puriqkunapaq. Kay wata fallan, para mana kanchu, segurakuna tiyan mikhunata, Todos Santos chaytaqa yakumanta qhaparinqanku. Jatun tarpuyki pisi puquy kachkan, temporalespi mana waliqchu, papataqa doble H churani, pisita uqharini, chunka tupusta uqharinay karqa, tawallata uqharini, maniytapis qarpawan yanapachini. Tiempoqa ujinayasallanpuni, watamanta wata paras menosyapuchkan, kawsanapaq jinalla puquyqa, vendenapaq mana kanchu, chhallitaspis pisi".





# “Sarapi criolla muju atipan, extranjero mujuqa ch’aki watata mana awantarpanchu”

## “Vendenapaq mana kanchu”

**Elmer Andrade (26 años), Rumi Cancha, provincia Campero:** “Kay wata producciónta pisisitu, runaqa mujitullata rescatachkan, vendenapaq mana kanchu. Nuqa churani sara, mani, chuwi. Kay jallp’itayman uk arroba mujuta churarqani, quintalta jinachá uqharisqa, mujitunqa llusinqa. Precios mana igualanchu, muju, trabajo, qhurana, perdiendo llusipuyku”.



“Tiempos antepasados qhawaq kanku, paykunapis manaña jap’ichinkuchu, tiempo ancha q’ala cambian. Puqy mana kaptin vida mask’akuq Chapare, Argentina, Chile ripunku. Jallp’ataqa saqipuchkan”.

## “Extranjero mujuqa ch’aki watata mana awantarpanchu”

“Kayqa q’illu sarita, kapuwaykupuni criolla mujitu, sapa wata churakuyku, kay mujutaqa may unaychus mirachikuyku, jallch’akuyku. Yanapapi extranjero mujuta apamurqanku, jaqaypi churamuni, mana puqurqachu, chhallalla karqa, mana kay ch’aki watata awantarpanchu. Kay q’illu saritaykuri temporalpi waliqllata puqun. Kaytaqa unay riqsini, tatay juch’uysitu kasaptiy tarpuqña, nuqapis qurichikurqani tarpukunaypaq”.

## “Papapis pisi, uk tupu mujumanta iskay tupullata uqharini”

“Papatapis allaniña, uk tuputa tarpukurqani, iskay tupullata uqharini, suma puquptinqa qanchis carga llusinqanman karqa. Kay wata febreropi granizadas karparin, fregarpawayku, chaymantapacha parapis mana kanñachu. Tiempo q’ala variasqa, rigor paritas, loco paras chayllapi ripun”.

## “Autoridadesmanta kunankama ni ima yanapa kanchu”

“Autoridades qhawaq jamunkuña, kunankama ni ima yanapa kanchu, anotachikuyku, dirigenteyku rin, manataq ni ima chamunchu. Seguro agricolaman anotachikuyku sindicatontin, dirigentes purisqallankupi kachkan, kanqachus manachus”.




# “Puqyta uqhariytawan, ch’usachkankuña llank’ayta mask’akamuq”

## “Para ñawpamurqa, qhipaman manañataq pararpanchu”

**Casiano Soria, Mizquepampa, alturas Mizque:** “Cosechaqa pisi á, uk 25% jinalla sara, trigo, papita ima puqurin, para pisi, pastopis mana kanchu, yakupis animalespaq ch’akipuchkan, papataqa khuruñataq khururpapun. Tarpurqani phichqa tupusta, suma puquspaqa uk 30 tupos llusinqanman karqa, kunanri uk 15 bolsaslla, para ancha pisi, tumpata ñawpamurqa, chaymantataq manañataq pararpanchu”.

## “Kay wataqa ñawpaq mit’as puqurin, chawpis, qhipas manaña llusinchu”

“Tiempo qhawarikuspapun tarpuyku, alteñosqa octubrepi ukllapi papa tarpuyman yaykuyku, kikillantaq sara, trigo, parataq saqirpapun, mana acompañanchu, sara paywarupi kachkaptin ch’akipun. Montesniykupiq sara mana kanchu, 100% pierdepun, chhallitalla karpan, wakitasllapaq, runapaq mana kanchu. Ñawpa mit’as tarpusqa puqun, chawpi, qhipa mit’as manaña llusinchu, cebada kikillantaq. Watapaq muju mana kanqachu”.



Alturas Raqaypampa: Ajinata uqharikuyku, wisapaq karillan

## “Uk chhikan triguitusta waqtarakuchkanku”

**Raúl Cabrera, presidente CREA – Raqaypampa, Alturas Mizque:** “Kay wata as llakiypi tarikuyku, papita uk 45% llusinqan, trigo mana kanchu, uk 95% pierdekapun, sarapuniqa mana kanchu, ni mujitupis salvakuchkanku, uchhika triguitusta waqtarakuchkanku.

Parita febrerollapipuni ripun, marzopi manaña karqachu, saqipun sarita paywachkaqpi, kay wataqa wisallapaq puqupuyayku, ranqhamunapaq mana kanchu, imawanchus materialeta wawapaq rantisqayku, runaqa puquysituta uqhariytawan ch’usachkankuña, llank’ayta mask’akamuspa”.

## “Uk hectárea pierdesqanmanta 2 bolivianos jap’ikurqa”

“Seguro Agricolamanta parlarispa, pasaq watas aparimurqanku. Uk Laguneño 2 boliviano hectárea mediayuqman jap’ikurqa. Hectareamanta 1000 bolivianos jayqakunqa nirqanku, pichus fallanpis ajina pisi chayamunanpaq. Kay wata planillas apakullantaq”.

## “Urapitayakuqpaq puqy mana kanchu”

**Marcos Sanchez, Ejecutivo CRSUCIRaqaypampa:** “Pisi para kay wataqa, mana tiempopi pararinchu, pierdesqanmantaña pararinpis, pisi producciónta, papa wakinpataqa uk 50% aswan mana kanchu, trigopis uraspiqa mana puqunchu. Pataspiqa sara waliqlla kay urapi tiyakuqpaqqa mana kanchu ni papa, ni trigo, ni sara. Seguro agricolapis uk miseria, mana watantinta mikhunapaq jinachu”.

## “Para ñawpaqman ririkapun”



**Hilarión Salazar (80 años), Ch’aqo, Subcentral Waka Wasi, Tiraque:** “Kay wata allin pispuni cosechasniyku, papapis vendenapaq mana kanchu, wiqsallaykupaq, grano kikillantaq. Para ñawpaqman ririkapun, enero, febrero para manaña karqañachu. Cebadapis cañarqullan á, mana kanpunchu, tukuy ima cosecha kay wata pisi. Papata waych’allatapuni tarpuyku, yuraqlata t’ikasarqa chaypi para samapun, saqipun”.

## “Kawsay mana kaptin wawas ripunku”

“Habaspis kikillantaq, para mana kaptin mana kanchu, yuraq criolla habasta tarpurqani. Ahh, febreropi qhasa chamun, sach’itaypis k’achitu kachkarqa, kay jina ch’akirpachin. Seguro agrícola mana chayamunchu, dirigentes alcaldiaman papelta presentasunchiq nichkarqanku, qhasipaq.

Ñawpata eneromanta, marzokama para qallariq, yakus kaypi demás kaq, kunan ni uywaman tomarichikunapaqpis kanchu, . Mana kawsay kaptin wawaspis ripunku, nuqaypata wawasniy Chaparepi, Argentinapi, Santa Cruzpi, uknillan kaypi”.

## “Seguro agrario qhasipaq, sonserita chayamun, propagandari may jina”

### “Puquyninta wayrañataq chhapparpan”

**Roberto Céspedes (71 años) Qollpana, subcentral Yuraq Molino, Carrasco:**

“Allin llakiy á, llakiyta allakuyku á, trigos, avenaspis allin llakiypuni, mana ajinachu kaq, sapa wata trigopis sumaq puquq, kay lugarqa triguero ari, sarasniykupis wakinkunas ch’usulla, uchhikita. Para mana tiemponpichu paran. Trigota t’akaykuni, iskay semanata mana paranchu, llakiypi llusqin. Puqurin

wayrañataq chhapparpachillantaq, kunan astawan wayramun, kay wayrawan mana sumaqtachu puquchkan, mana coloreancho, kunan yuraqyarpallanña, pampapi trigoqa wich’ukuchkan, pipoca laya kay trigoqa, tumpawan jasita wayrañataq anchata chhapan”.

### “Tiempo qhawaypi mana as jap’irpanichu”

**Segundino Silva, comunidad Marquilla,**

**Campero:** “Kay wata desastres naturales qhatiriwayku, qhipantataq granizada, sequía jamullantaq, para mana qhipaniqman karpancho, ch’akipun, llakiypi saqiwayku. Parlaq uyarirqani, fenómeno “El niño” saqra paras kanqa. Sach’aspi mana cuenta qukurqanichu, kay wata tiempo qhawaypi mana as jap’irpanichu. Ruphayllaña, p’unchaypis mana llank’anapaq jinañachu”.

### “Chhikachaq granizota ni jayk’aq rikurqanichu”

“Sarata tumpawan menosta churarqani, desastres naturaleswan ni tercera partetapis uqharichkaykuchu. Pascua domingopi jatuchiq granizo urman, chay paqarin phuyus ujinalla kachkarqa, mal tiempollatacha ruwamunqa

Kayqa sach’a pelón, ajinata chhallata uywapaq jallch’akunchis.

nirqani, uklata patallapiña sonaqa uyariyku, chayratitu phuyu t’impun, t’impun, yastá granizo jich’akunpacha, casi iskay horata granizan, jatuchiq bolas, ni jayk’aq rikuyku karqani, sach’ataqa q’ara k’aspirpan. Trigota casi hectarea kuraqta seco chinkachipun, ni imaynita kanchu pajallaña, ni uk q’api kanchu ruthunapaq. Seguro agrarioqa qhasipaq, anotachikurqayku dirigentes mana exigiptinku mana chamunchu, sonserita chayamuspaqa chamun, mujitusta iskay arrobotata, arroba meditata apamunku, propagandaqa anchataq ‘qullqi t’aqasqa’, nispa parlamun”.

### “Señas sut’i karqa ch’aki wata kananpaq”

**Eusebio Vargas, Wara Wara, Campero:** “Señas sut’i karqa ch’aki wata kananpaq, ñawpaqta tumpitasta pararpan chaymanta qhipata paran. Sarapi nuqa enterota pierdepuni, papitata uchhikitata churakurqani chaypis pierdellantaq. Sarapi ni el 10% cosechita mana kanchu, mujuta mana rescatanichu. Wallpitapaq jina pisisitu, mut’ipaq mana kanchu, wisitapaq jinalla kachkan. Kay wataqa perdida trabajoykuqa, costos de producción pierdenña. Kawasanaqqa mask’akunayku tiyan, ganarikamuna tiyan, llusqina tiyan, chaywan solvetakuykuman, mujutaqa si o si rantikunayku tiyan”.

## “Abono químicoqa khuruta papapi rikhurichin”

### “Qhasaykun, chaqra waqanapaq jina karqa”

**Agustín Poma Canaviri, comunidad Maraca,**

**Uncia, Norte Potosí:** “Cosechasqa sapa wata allin kakuchkaq, kunan watapuni q’ala ch’akiykapun, ancha ch’aki, qhasaykapun, khuyay, mana papa chaqrapis qhawarina jinachu karqa, waqana jinapuni karqa, mana nuqapis qhawarimurqanichu, mikhunapaq mana alcanzanqachu. Campo runa tarpunaman yachasqa, mana maymanpis rina jinachu, lasta suncha nispalla nichkayku. Para escasean, uywapaqpis pasto ni kanchu, ni cebadapis wiñancho, yaku mana kanchu, wayq’u q’ala ch’akisqapuni, uywataqa venderakapuchkanku”. Tiempota wayrallapi qhaway yachani, qayna wata qhipata wayran, qhipata paranqa nirqani, ni kanchuqa. Agostopi phuyu llusqimun kimsa p’unchayta: 1, 2, 3, qayna wata nipuni phuyumurqachu, 4 agostota phuyu llusqimun, chayrayku mana paranchu”.

### “Abono químico khuruta papapi rikhurichin”

**Florencio Carata Chuima, comunidad Maraca-**

**Uncia:** “Cosechas pisi, mana paranchu, papaqa q’ala khuruykusqataq, chay abono químico khuruchin, ñawpata abono mana kachkaqtin mana khuruqchu, unayqa wanullawan tarpuq kayku, puqukullaq. Kunan papaqa khurulla, vendenapaq mana waliqchu, mikhunallapaq”.

### “Tiempo ujinayapun”

“Kunan astawan pisiqa, manaña kanchu. Cebadapis khuchkan qhasaqa khuchkan mana. Ñawpataqa kusa karqa ari, tiempo ujinapuni í, q’uñiraqtaq kanpis, mana jina q’unichu ñawpata kaq, chiri kaq. Todos Santos tiempoqa imaynachus kanqapis, yakupis niña kanchu mayuspiqa”.

### “Papa llusqimusaptin qhasañataq qhasaykun”

**Eleuterio Castillo (72 años) comunidad Añuchiri,**

**Oruro:** “Cosecha maychus chaylla, para mana kaptin tarpuykuna mana allincho kachkan, pisi qhasataq qhasaripun, chaqra ruwasqaman jina cosechakun. Papa llusqimusaptin qhasañataq qhasaykapun, parañataq kitarikapun, mana sumaq paranchu, ch’aki watataq kapun, pisi puquy. Tiempota pisi qhawani, wayramun chay tiempoqa allin. Qayna wata agostopi qhipata wayrarqa, qhipa tarpuy kusalla, ñawpaqta wayramun ñawpaqtataq paramun”.

### “Kay wata aswan pisi”

**Victoria Condori, comunidad Maraca, Municipio Uncia:** “Papa kusalla kachkan, khuru yaykupuchkan. Mana para kaptin, ancha ch’aki jallp’a, kunan wata aswan pisi. Yanapas pisi chayamun, papitata arrobakama jaywamuwarqayku. Jilanq’usniyku urqh umunku”.

### “Chhiwi pampitapi thapachakusqa, mana paranchu”

“Tiempo qhaway yachani, chhiwi p’isqupi, ñawpata runtuchan á, kay wata p a m p i t a l l a p i thapachakusqa, mana paranchu á, kimsa kutilla pararpan. Qhasaqa junio, julio, noviembre kamaraq qhasan, noviembrepis tarpusqaña karqa á, ñawpaq tarpusqataqa qhasaykapun, pisita puqun, manaña kutirinñachu”.

# “Wanuqa humedadwan, ruphayan puquykun, chay waliq”

*La producción ecológica se basa en tres acciones principales: uso de insumos naturales, (wano de los animales), la diversidad en los cultivos y la rotación de cultivos. En este número hablaremos del uso del wano con Don Elías Condori de la comunidad Bajo Chillavi, provincia Ayopaya, que nos cuenta como alista el estiércol ovino para la siembra de papa.*

## IMA TIEMPO WANUTA WAKICHIKUNKI?

### “Tarpuyku: lluqchi, chawpi lluqchi, wata tarpuy”

“Mayo, junio killa wakichikun wano tarpunapaq, qallarinchis tarpuyta 15 agostomanta, noviembre killakama, kimsa kutiyta tarpukun: lluqchi, chawpi lluqchi, ultimo wata tarpuy. Oveja corralmanta recién urqhusqa, wanu fresco mana ancha waliqchu, rezagoqa wanu aswan kusa, wanuqa humedadwan, ruphayan puquykun, makisninchiswan mana llankhasumanchu, chay khurus wanuwan alimentakunku, watiqmanta wanu ruwallankutaq, chay kusa wanu”.

### “Ukhunpi wanu aswan kusa patanmanta nisqaqa”

“Urqhunapaq wanuta ch’aki kaptin yakuwan jich’ana, madera rastrilluwan urqhuna. Ukhunpi wano aswan kusa patanmanta nisqaqa, chay wanupis rezagollataq. Tarpuptinchisqa iskay laya wanuta churana, rezagota frescotawan, jallp’apiqa khuritos llank’allanqankupuni”.

### “Llama thakiyaqa wayk’ukunallaykupaq”

“Nuqaykuqa mana utilizaykuchu llama wanuta (kaypi sutin thakiya), wayk’ukunaykupaq llama wanuta apayku. Wakinqa utilizanku allpaca wanunta tarpunapaq, oveja wanu pisi kaptin allpaca wanuta utlizayku. Maypichá wanu tiyan aswan kusata chaypi puqun, chayrayku mana uk chiqallapi tarpunachu, ovejasta michinku chaypi aswan kusata puqun”.

## TARPUNAPAQ MACHKATATAQ WANUTA CHURANKI?

### “Pesada mujuman pusaq gangocho wanu yaykun”

“Machkachus ovejas tiyan, chayman jina tarpukuna, uk pesada mujuman pusaq gangochos wanu yaykun, qanchis gangocho rezago wanu uk gangochotaq fresco wanu. Uchhikata wallpa wanuta churayku, yanapan, kunan valesqaña wallpa wanu, sapa cubo 120 bolivianos, transporteqa 100 bolivianos cubomanta, cargata carroman quptiy rebajawan a 50 bolivianos. Chayrayku wanu tiyapunawanchispaq, ovejitata uywakunapuni”.

### “Ovejitas achka q’umir kaptin achkata wanuta quwanchis”

“Paraqtinqa achka wanu tiyapuwanchis, ovejitanchis achka q’umir kaptin achkata wanuta quwanchis. Uk familia uywanan kanman 100 aswan ovejasta, tiyapunanpaq suficiente wanu tarpunapaq. Wakinqa tarpunku quimicollawan, wakinqa wallpa wanullawan”.

## IMAYNATATAQ PUQUN OVEJA WANUWAN, WALIQCHU KANMAN QUIMICOWAN TARPUNA, MANACHU?

### “Quimicotallapuni churaptinchisqa, mujupis chayllataña munan”

“Quimicotallapuni churaptinchisqa, mujupis chayllataña munan, mana quimico churaptinchisqa manaña puquyta munanchu, jallp’apis ch’akipun, chayrayku manaña kusachu quimico churayqa. Quimicowanqa primerotaqa kusalla puqurpan, qhipamataq manaña puquy munanchu. Wallpa wanuwan casi kikillantaq, quimico jinallataq”.

### “Quimicowan papaqa k’atu pachalla, wanituwanri jak’itu chayan”

“Papaqa quimicowan, wallpa wanuwan tarpusqa mana kusachu mikhunapaq ma saborniyuqñachu, mana chayayta atinchu, k’atu pachalla. Oveja wanuwan tarpusqa aswan jak’ituta chayan, aswan apurata chayan, misk’isitu”.

## MAYK’AQMANTAÑATAQ ABONO QUIMICOWAN TARPUNKU?

### “Reforma Agraria tiempopiqa abono quimicota mana riqsirqaykuchu”

“Reforma agraria tiempopiqa mana riqsirqankuchu abono quimicota, paraq tiemponpi, ruphaysis mana sinchichu karqa, mana fumigakuqchu kayku, t’ujtu, yuraq pantalón, piki piki unquypis mana kaqchu. Ch’aki tiempo kaptinqa t’ujtu rikhurin, ancha para kaqtinqa yuraq pantalón rikhurin. Chay tiempopiqa papa waycha má karqachu, SEPA apamuwayku, chaypi qallarikurqa quimicoswan tarpuna, chayqa 1990 watapi, chaymantapachallataq unquykuna rikhurin”.

### “Mak’unkumanta papa mujuta urqhuna kanman”

“Nuqa niyman wanitullawan tarpunata. Kunan yachana imaynatataq naturalmente controlasunchik chay unquykunata, manaña quimicowancho. Umacharikuni mak’unkumanta papa mujuta urqhuna kanman, sinchi

## Con semilla del mak’unku la papa se tiene plantas más vigorosas

*Las comunidades Chillavi, Bajo Chillavi, Palta Cueva (Ayopaya), Ñunumayani, Valentía (Tapacari) Misuk’ani, León Rancho, Sapilica, Yegua Cancha, Totorá Mayu, Paqcha Pata (Vacas, Arani) con el apoyo de CENDA vienen realizando el proceso de recuperación de la semilla de papa para fortalecer la fuerza y sanidad de la semilla y recuperar variedades perdidas a partir de la semilla botánica o baya, conocida también como mak’unku, t’eqe t’eqe, aylinku, etc.*

*Tata Elías Condori, Chillavi-Ayopaya nos cuenta: “Todos los años saco semilla del mak’unku, esta cosecha ya es la quinta generación, desde hace cinco años que saco semilla del mak’unku. El primer año he cosechado ch’ili murmu, segundo, tercer año ya había qolqe, ahora quinto año ya tengo qolqe y chapara”.*

“La semilla de papa ha ido mejorando. Dos cosas he visto: El primer año he sembrado con semilla de mak’unku de papa waych’a y han aparecido 4 variedades de papa, hasta ahora no se han perdido pero tampoco han aparecido otras nuevas, se mantienen las variedades. Las variedades que han aparecido son: blanca sin mancha, puka siki, puka con ojos blancos, puro rojo con corazón amarillo, algunas de estas variedades ya conocíamos pero se perdieron y con la semilla del mak’unku hemos recuperado las variedades perdidas y otras son nuevas variedades”.

La papa sembrada con semilla obtenida del mak’unku está lista para cosechar (práctica ancestral)

En el presente momento se muestra la información sobre la tecnología

papa sembrada con semilla de SEPA aún está inmadura (semilla mejorada)